

Anwar OK dengan enakmen antilompat parti

MalaysiaKini.com

28 Ogos, 2012

Oleh Ahmad Fadli KC

Ketua Umum PKR, Datuk Seri Anwar Ibrahim berkata beliau tiada masalah dengan cadangan Pulau Pinang untuk memperkenalkan enakmen antilompat parti pada bulan November ini.

Menurut Anwar, Ketua Menteri Pulau Pinang Lim Guan Eng sendiri memaklumkan perkara itu secara peribadi kepada beliau semalam.

"Tiada masalah (dengannya). Ketua menteri sudah lapor pada saya semalam," kata Anwar mengulas ringkas sewaktu ditemui di Shah Alam hari ini.

Enakmen itu sebelum ini dilihat sesetengah pihak sebagai tidak selari dengan tindakan Anwar meyakinkan dua ahli parlimen Sabah keluar BN dan mengisytiharkan diri mereka mesra Pakatan.

Lim yang juga setiausaha agung DAP semalam berkata, langkah memperkenalkan enakmen itu di Pulau Pinang dengan sendirinya menjelaskan pendirian mereka terhadap situasi di Sabah itu.

Menurutnya lagi, mana-mana wakil rakyat yang mahu melompat parti perlu meletak jawatan dan mendapat mandat baru dari rakyat. Bagaimanapun katanya, undang-undang sedia ada tidak membenarkan perkara itu.

Sementara itu, Selangor bagaimana pun belum membincangkan cadangan memperkenalkan undang-undang sama, menurut exco negeri pelbagai parti Rodziah Ismail (PKR-Batu Tiga), Ronnie Liu (DAP-Pandamaran) dan Dr Halimah Ali (PAS-Selat Klang).

"Kita belum bincang lagi undang-undang antilompat (di Selangor)," kata Rodziah.

Copyright © 1999-2012 Mkini Dotcom Sdn. Bhd

Source: <http://www.malaysiakini.com/news/207280>